

TORITENY - ALAHADY faha-27 TSOTRA - TAONA D



NY OLONA MANAM-PINOANA TSY MIANDRY VALISOA EO NO HO EO

Ry Kristianina havana handinika isika araky ny hafatry ny Papa amin'ny fankalazana ny faha 100 taona ny misiona izay hidirantsika koa amin'ny fandinihana ny maha misionera antsika ao anatin'ny Eglizy dia ny hoe vita batemy aho ka hirahina.

Vakiteny I : *Hab. 1, 2-3; 2, 2-4*

Salamo : *Sal. 94*

Vakiteny II : *2 Tim. 1, 6-8. 13-14*

Evanjely : *Lk. 17, 5-10*

Ny antsika eto amin'ny diosezy dia mampahatsiaro antsika tamin'ny fanokanantsika ny tanana Antsiranana sy ny diosezintsika amin'i Masina Maria sy Fo madion'i Maria. Mitondra antsika amin'ny taonan'ny masin'ny misiona, hahatonga antsika ho EOY sy ETA ka ho génération

mpanorina, manorina Eglizy fanjakan'Andriamanitra hahatonga antsika ho iraka eo anivon'ny mpiara-belona amintsika, hahatonga antsika ho Kristy mpiara-belona amin'olona. I Kristy no misionera voalohany nirahin'ny Ray hitory ny vaovao mahafaly, izy naniraka ny apostoly sy antsika mianakavy ho amin'izao tontolo izao ary ireo manodidina antsika no hanirahana antsika voalohany indrindra.

Matetika isika mieritreritra fa lavitra izao tontolo izao ka sarotra tanterahina ny iraka nefa ny tontolo manodidina antsika no hanirahana antsika voalohany. Manana modely isika, azo lazaina fa izy dia misionera voalohany ihany koa manaraka an'I Jesoa rehefa nahazo ny fiarahaban'ny anjely dia lasa namonjy an'I Elizabeta rahavaviny ka niara-nidera an'Andriamanitra izy ireo. Izany no maha misionera antsika dia ny fametrahana an'Andriamanitra eo anivon'ny fiainantsika, hahazantsika mampitraotra ny finoana sy ny fiainanana andavanandro. Azontsika izany ny antony nanokana ny tanantsika sy ny diosezintsika amin'ny Fo Madion'I Maria satria isika no voatokanana ka zary manana ny fo madio tahaka ny an'I Maria isika tsraikiraiky. Fo hitondra an'I Jesoa amin'izao tontolo izao misy antsika.

Ambaran'ny evanjely amin'izao Alahady faha 27 mandavantaona izao sy ireo vakiteny arosan'ny Eglizy ho antsika fa tsy miandry valiny izay manam-pinoana, entintsika hanohizana ny fandalinam-pinoana mba haninteraka ny fiainantsika tokoa ny finoana ka hahatonga antsika ho misionera marina tokoa. Matetika araky ny henontsika tamin'ny fandalinana nandritra ny alahady maromaro izay dia mety misy fotoana mampavesatra izany fivelomana ny finoana izany, mety misy ny fahakiviana, misy ny sedra fa androany ambaran'I Jesoa amintsika fa raha olona manam-mpinoana iisika dia mahavita zavatra mahagaga. Ny fivelomana ny finoana dia maimaim-poana tsy mila valisoa, ny olona manam-pinoana tsy miandry valisoa fa mpanompo izy. Niaina izany I Masina Maria raha nandeha nanambara ny vaovao mahafaly tamin'I Elizabeta dia nijanona koa nanompo tamin'ny fanampiana azy izay efa bevohoka enimbolana, manambara ny finoana velona ny fifankahitan'izy mirahavavy, mifampizara ny vaovao mahafaly sy midera an'Andriamanitra.

Manontany matetika isika ahoana ny hahafantarana ny finoana velona ?

Ny voalohany dia isika mandray an'Andriamanitra eo anivon'ny fiainantsika ka Andriamanitra ivon'ny fiainantsika, Izy no manilo ny fiainantsika izany hoe amin'ny alalany sy miaraka Aminy ary ao Aminy no hanatanterahantsika izay ataontsika rehetra. Izay no nataon'I Masina Maria, aoka ho tanteraka amiko araky ny sitrakao. Ny valinteny nataony dia midika fa Mivelona ny sitrak'Andriamanitra izy.

Ny faharoa miseho ety ivelany hahafantarana ny fivelomana ny finoana dia raha manaso ny hafa, ny be sy ny maro isika tsy misy havakavaka , izay no nataon'I Masina Maria raha nandeha nikarakara sy nanampy ary nanompo ny rahavaviny izy.

Ry Kristianina havana, azo lazaina fa foton-pampianarana lehibe amin'izao volana oktobra izao ireo volaza ireo, volana oktobra volan'ny raozery hibanjinantsika ny fanjavan'I Masina Maria, volan'ny raozery handinihintsika rehetra vita batemy ny mahazanak'Andriamanitra antsika. Nanao Eny tahaka an'I Masina Maria isika ka irahiana. Mampiditra antsika eto amin'ny diozezy amin'ny taona manokana taona masiny misiona ka handalinantsika ny maha katolika antsika "vita batemy aho ka hirahina eo anivon'ny mpiara-belona", hahatonga antsika ho Kristianina araky ny lazaintsika matetika Kristy no velona ao amintsika ka mahatonga antsika ho Kristy mpiara belona amin'ireo manodidina antsika.

Ampiatsihaivin'ny vakiteny voalohany amin'ny bokin'i Habakoka fa ny olona manam-pinoana dia velona mandrakariva ary ny fivelomantsika ny marina eo amin'ny fiainantsika dia manambara ihany koa fa velona ny finoantsika, izany no fanompoana.

Raha nangataka ireo mpianatra ao amin'ny evanjely, ampitomboy ny finoanay, dia nolazain'i Jesoa fa na dia bitika ny finoana, fampianarana lehibe izany, dia mahavita zava-mahagaga isika.

Midika izany fa isika manome toerana an'Andriamanitra.

Io no Olana matetika satria tsy omentsika toerana Andriamanitra, miasa samirery isika matetika, mitady andriamaninkafa ka voafitapitaka dia diso fanantenana. Ny tadiavin'Andriamanitra dia isika manome toerana azy ary tsy inona izany fa manao ny asan'Andriamanitra.

Raha manao ny asan'Andriamanitra tokoa isika dia Andriamanitra hanao ny asantsika. **Manambara fa velona tokoa ny finonatsika raha manao ny asan'Andriamanitra isika.** Averimberintsika matetika izany, izany no tian'i Jesoa ambara amin'ny hoe na bitika ny finoantsika dia mahavita zava mahagaga isika.

Milaza koa I Habakoka fa matetika isika voan'ny hakiviana satria mikatsaka zavatra ety ivelany ka voany fakam-panahy ~~fa~~ mitady hanome tsiny an'Andriamanitra. Amin'ny vakiteny voalohany “ *Fa ny marina no hivelona amin'ny finoany*” Raha isika mivelona amin'ny finoana mametraka Andriamanitra eo anivon'ny fiainantsika dia izy no hanao ny asantsika.

Manao ny asan'Andriamanitra isika raha manao ny marina, io no antitranterin'i Habakoka, miala amin'ny lainga, ny fitapitaka, ny herisetra fa mampanjaka ny fifankatiavana, ny rariny sy ny hitsiny ary manatanteraka ny sitrak'Andriamanitra isika. Izany no atao hoe miaina ny finoana izany hoe omen'Andriamanitra antsika maimaimpoana ny finoana ka anjarantsika ny mivelona azy.

Milaza i Jesoa amin'ny evanjely amin'ny fanoharana ataony, maimaimpoana koa ny fanompoana satria fanomezan'Andriamanitra maimaimpoana ny finoana nomeny antsika ka mahatonga antsika araky ny fanoharana, “*Mpanompo tsy mahasoa izahay, fa izay tsy maintsy ho nataonay ihany no hany vitanay*”. Tian'i Jesoa isika manatanteraka ny sitrapon'Andriamanitra dia isika manompo ny namantsika ary izany no nataon'i Masina Maria rehefa nandeha tany amin'i Elizabeta rahavaviny izy. Ny anjarantsika dia isika manatanteraka ny sitrak'Andriamanitra amin'ny alalan'ny fanompoana.

Fantatsika fa tsy mifanaraka amin'ny hevitr'izao tontolo izao ny fanompoana izany satria ny ~~azy~~ an'izao tontolo izao dia izy no ~~ho tompoina fa tsy izy hanompe~~ ho tompoina, mifanohitra amin'izany anefa I Jesoa tonga mba hanompo fa tsy ho tompoina. Izany no maha Kristianina antsika sy ny maha misionera antsika.

Izany no antony nandehanan'ireo misionera taty amintsika, hanompo sy hikatsaka izay mahasoa antsika. Tsy inona fa ny hafantarantsika an'Andriamanitra ka hahazoantsika ny fiainana.. Izany no lalam-piainantsika hahafantarana fa mino isika tahaka ny nataon'i Masina Maria.

Mahatonga ny fiainantsika mamokatra izany nefa mamokatra tsy araky ny fihevitr'izao tontolo izao izay mitondra amin'ny fanapotehana, hitantsika izany amin'ny tontolo iainantsika. Raha anatin'ny fanompoana fikatsana ny rariny sy ny hitsiny ny fiainantsika dia hamokatra hamokatra araky ny sitrak'Andriamanitra Izay no mahatonga antsika ho EOY manorina ETA KA HAHATONGA ANTSIKA HO TARANAKA MPANORINA.

Nananatra an'I Timote zanany I Md Paoly amin'ny vakiteny faharaoa ka mananatra antsika ihany koa : *“ Ry zanako malala, mananatra anao aho mba hamelombelona indray ny fanomezam-pahasoavan'Andriamanitra ao anatinao, izay noraisinao tamin'ny fametrahako tanana taminao. Fa tsy Fanahy osa no nomen'Andriamanitra antsika, fa Fanahy mahery sy be fitiavana ary mahonontena. Koa aoka ianao tsy ho menatra ny ho vavolombelon'ny Tompontsika, sy noho ny amiko izay mpifatotra ho Azy, fa hiara-mijaly amiko noho ny Evanjely, miankina amin'ny herin'Andriamanitra”*

Ry Kristianina havana, ny batemy noraisintsika dia nandraisantsika ny Fanahin'Andriamanitra izay mankahery antsika, ny konfirmasio raisintsika dia mahatonga antsika ho vavolombelona, aoka ho tany lonaka isika ka hamokatra, mamokatra isika raha mijoro ho vavolombelona na dia amin'ny fototana sarotra na misy ny mpanjenika aoka hijoro amin'ny fanompoana, izany koa no katsahintsika amin'izao taona masin'ny misiona izao mba ho katolika tokoa isika mandalina ny finoana, katolika mandray an-tanana ny Eglizy, katolika manompo mirotsaka amin'ny fikambanana masina ka mandalina ny finoany ary mijoro eo anivon'ny mpiara-belona ary mikatroka amin'ny alalan'ny vaomieran'asa, katolika faly mankalaza an'Andriamanitra satria ny tanjon'ny misiona dia tsy hoe fampiharam-pahefana fa fanitarana ny fanjakan'Andriamanitra ka ho fanjakan'Andriamanitra hanjakan'ny rariny sy ny hitsiny hahatonga antsika ho olo araiky ao amin'Andriamanitra, ho fianakaviamben'Andriamanitra, izany no antony maha iraka antsika. Ireo rehetra no tendrombohitra hafindra voalazan'ny Evanjely afaka hifindra raha manampinoanana dia toa ny voatsinapy isika.

Ry Jesoa Tompo ô, ianao tokoa no nampianatra, tsy vitan'ny nampianatra fa nanome ohatra velona anay, ianao tokoa no iraky ny Ray ka tonga eto anivonay, nanolo-tena ho mpanompo mba hanavotra anay, ampianaro izahay mba ho tena mpanompo mahatoky tokoa na dia fantatrao ny tsy fahamendrenay ka hahay hikatsaka mandrakariva ny hahasoa.

Ry Masina Maria Renin'Andriamanitra mibanjina anao manokana izahay amin'izao volana oktobra izao, ampianaro izahay ho “Eny” mandrakariva ny fiainanay hanao ny asan'Andriamanitra amin'izay Andriamanitra hanao ny asanay ka ho lavorary izay asa ataonay izay. Tsy inona fa ny fanitarana ny fanjakan'Anriamanitra.

Ry Jesoa Tompo ô, ampianaro izahay ho tena misionera amin'ny ataonay rehetra mba ho mapnomo tokoa ka tsy maintsy manao izay hampanaovinao izahay. Amen